

«In luxus da far da questas dispitas»

Reacziuns a la schliaziun da la grupp davart il PI 21

DA FLURIN ANDRY / ANR

■ **Dacurt ha la Lia Rumantscha communitgà che la grupp accumpagnanta per dumondas da scola en vista al PI 21 na chattia nagin consens. Domenic Toutsch e Bernard Cathomas deploreschan quai.** En vista a la consultaziun dal Plan d'instrucziun 21 (PI 21) aveva la Lia Rumantscha (LR) convocà questa stad ina grupp accumpagnanta per dumondas da scola. Da quella grupp faschevan part represchentants da las Conferenzas generalas da la magistraglia rumantscha, da la Scol'auta pedagogica dal Grischun, da Pro idioms, da Pro rumantsch e da la LR. Uss è quella grupp però vegnida schliada, ins n'haja chattà nagin consens, di *Urs Cadruvi*, il secretari general da la LR. Las organisaziuns participadas prendan individualmain posiziun davart il PI 21. La LR ha annunzià da communitgar sia posiziun en connex cun il project parzial grischun entaifer il PI 21 la fin d'october. Tge din il copresident da la Pro idioms *Domenic Toutsch* e l'antierur secretari general da la LR *Bernard Cathomas* da la disditga da las tractativas da la grupp accumpagnanta per dumondas da scola?

«Dischillus da la regenza grischuna»

«Il model da coesistenza aveva vairamain previs che tuts scolars hajan dad emperder passivamain l'autra varianta dal rumantsch, idiom u rumantsch grischun (rg)», di Toutsch. Il PI 21 na resguarda però betg quest concept vicendaivel, «il



Domenic Toutsch e Bernard Cathomas deploreschan che la grupp accumpagnanta per dumondas da scola davart il Plan d'instrucziun 21 è vegnida schliada.


FOTOS Y. BÜRKL/J. DIENER

PI 21 dat dapli paisa al rg». A ses avis n'èsi betg d'esser stut che las gruppas nun hajan chattà in consens: «Sche las gruppas da la vart dal rg vulan sfurzar tras il rg sco lingua d'alfabetisaziun, era sch'ellas san che l'Engiadina e la Surselva na vulan quai betg, alura èsi evident che las tractativas n'han betg success.» Domenic Toutsch è trist e dischillus da la regenza grischuna: «Era sche quella ha pudì observar tut il svilup da la dumonda rg en scola n'ha ella fin uss betg resguardà la voluntad da la maioritad da las vischnancas rumantschas. Sperain be ch'ella reali-

seschia tuttina il model da coesistenza sco empermess.» Uschiglio agiss la regenza lunsch davent da la voluntad dal pievel rumantsch, di el e punctuescha: «Instruir rg passivamain sin il stgalim aut fiss in gudogn per questa varianta dal rumantsch.»

«Sa concentrar sin quai ch'è veramain impurtant»

Era Bernard Cathomas deplorescha che las partidas en la grupp accumpagnanta nun han chattà in consens: «Sch'ins vul far in cumpromiss ston omaduas grup-



pas vegnir encunter l'ina a l'autra, sche tuttas duas varts cultiveschan lur chaprizis, alura na datti betg ina soluziun.» A ses avis fissi uras da schmetter da far dispita e lavurar l'in cun l'auter, sa concentrond sin ils problems ch'existan en las regiuns: «Nus avain tut auters problems en las regiuns rumantschas, p. ex. mancanza da scolars rumantschs, germanisaziun progredenta, reducziun da l'impurtanza dal rumantsch etc. – perquai èsi in luxus da far da questas dispitas.» La disditga da las tractativas nun èn sco che Bernard Cathomas di nagina victoria ni

per ils aderents dal rg en scola ni per ils auters, «igl è in donn per il rumantsch, e betg mo per il rg.» El punctuescha ch'ins sappia exactamain ch'ins dovria tant ils idioms sco er il rg, «perquai faschain quai, mantegnain ils idioms e resguardain er il rg, causa che ch'el è indispensabel. Dain als uffants la schanza dad emperder era rg.» En tge furma che quai duai vegnir fatg, sch'il rg duai vegnir introduci sin il stgalim aut, mesaun u bass, quai han sco ch'el menziuna «da decider ils responsabels da scola e betg ils polemichers».